



The Gazette of Meghalaya

EXTRAORDINARY
PUBLISHED BY AUTHORITY

No. 158 Shillong, Meghalaya, December 23, 2015 2nd Pausa, 1937 (S.E).

PART – IIA

OFFICE OF THE JAINTIA HILLS AUTONOMOUS DISTRICT COUNCIL,
JOWAI

NOTIFICATION

The 21st December, 2015.

No. JHADC/Leg/7/2015/15: - Katkum ka paragraph kaba khadwei jong ka Sixth Schedule ka Constitution ka Ri India, ia kane ka Ain jong ka District Council, Jaintia Hills Autonomous District la pynmih hangne ban iatip paitbah.

Ka Jaintia Hills Autonomous District (Ka Ain ban Seng Elaka bad Shnong bad ka Jingjied, Jingthung, ka Bor, ka Jingtreakam bad u Pud treikam jong ki Dolloi/Sirdar bad Waheh Shnong) Act, 2015.

(La passed da ka Jaintia Hills Autonomous District Council ha ka jingiashong Dorbar mang tyngka (Budget Session) ba la long ha u bnai Lber, 2015 bad la pynbeit bad pynbha ha ka Dorbar kyrpang ba la pynlong kyrkieh (Emergent Special Session) ha ka 3 tarik Naitung, 2015, bad ruh ba la pynbeit bad pynbha biang ha ka Dorbar kyrpang ba kyrkieh (Emergent Special Session) ba la long ha ka 21 tarik u Nohprah, 2015).

La ioh ia ka jingmynjur u Lat ha ka 23 tarik u Nohprah, 2015.

(La pynmih ha ka Gazette ka Meghalaya extraordinary issue ha ka 23 tarik u Nohprah, 2015).

Ka Jaintia Hills Autonomous District (Ka Ain ban Seng Elaka bad Seng Shnong bad ka Jingjied, Jingthung, ka Bor, ka Jingtreakam bad u Pud treikam jong ki Dolloi/Sirdar bad Waheh Shnong) Act, 2015.

KA AIN

Jinglamkhmat.

Ha kaba ki Elaka ba don mynta ki long ki kyntoit hima ba la wan pateng naduh mynbarim ha ka rukom synshar hima ki riewlum trai shnong ha Ri Jaintia State Meghalaya bad ha kaba ki Dorbar Shnong hapoh kita ki Elaka ki long ka bor synshar shnong jong ki nongshong shnong riewlum trai ri ha kine ki lum naduh ki por barim bajah.

BAD

Ha kaba u Dolloi/Sirdar u long u khlieh nongsynshar ba wan pateng kat kum ki riti ki dustur bad u long u nongtrei kam rangbah bad uba ha khlieh ia ki Shnong badon ha kata ka Elaka, bad ba ka jingjied, jingthung kam ban bat ia ka kam Dolloi/Sirdar bad Waheh Shnong la ju pynlong na ka por sha ka por da la ki Elaka bad la ki Shnong hapoh ka jingpeit jingkhmih ka District Council.

BAD

Ha kaba la idei ban thaw ki kyndon ain kiba iadei bad ka jingseng Elaka bad seng Shnong bad ha kaba buh beit ia ki bor, ki kamram bad u pud treikam jong kine ki nongkitkamka ban kythup naduh ka jingjied bad jingthung kum u Dolloi/Sirdar bad Waheh Shnong katkum ba idonkam ha ka kam synshar khaddar ka Jaintia Hills Autonomous District katkum ba la pruid dak ha ka Sixth Schedule ka riti synshar ka Ri India.

Kumta, ka District Council jong ka Jaintia Hills Autonomous District ha kaba pyntreikam ia ka bor ba la pynkup ha ka ban thaw ain hapoh ka Clause(c) na ka bynta ka jingseng Shnong lane Town Committee bad ka bor jong ki, (f) ki kam ba iadei bad ka jingsynshar Shnong ne Town Committee, (g) ka jingthung kam bad hiar pateng jong ki khlieh nongsynshar bad ki Waheh Shnong bad (j) ki riti ki dustur ha ka imlang sahang kiba hapoh ka sub-paragraph (1) jong ka paragraph ba 3 jong ka Sixth Schedule ka Constitution ka Ri India bad kiwei kiwei ki bor ba la pynkup ha kane ka liang, la thaw hangne ia ka Ain kaba yn mynjur da u Lat na ka bynta ban pyntrei kam hapoh Jaintia Hills Autonomous District ha ka rukom ba la pyni hangne.

La thaw ia kane ka Ain ha ka SNEM REPUBLIC BA HYNRIEW PHEW HYNRIEW KA RI INDIA kumne: -

1. Ka Kyrteing, ki pud treikam bad ka jingsdang (short title, extent and commencement): -

- (1) Ia kane ka Ain la khot ka Jaintia Hills Autonomous District (Ka Ain ban Seng Elaka bad Seng Shnong bad ka Jingjied, Jingthung, ka Bor, ka Jingtreikam bad u Pud treikam jong ki Dolloi/Sirdar bad Waheh Shnong) Act, 2015.

(2) Kan trei kam ha baroh u pud ka Jaintia Hills Autonomous District.

(3) Kan trei kam noh shisyndon.

2. **Jingbatai (Definition):** - Ha kane ka Ain lynda donkam da kumwei pat, kine ki jingbatai harum ki long ki jingmut jong ki ktien ba la pyni hangne.

(1) "Adult" (Kiba la san): - Ka mut ia u/ka briew ba la dap 18 snem ka rta shaneng kiba shong bas ah ha ka shnong hapoh ka Elaka.

(2) "Custom" (Riti-Dustur): - Ha ka jingiadei bad kano kano ka Elaka ka mut ki Rule, ki rukom ba ju leh kiba iadei bad ka jingjied, jingthung Dolloi/Sirdar bad Waheh Shnong kiba ju don ha kata ka Elaka, kiba dang iai bteng bad iai bud ryntih bad ba la ioh ia ka jingithuh ki bor ka Ain ha kata ka Elaka.

(3) "Customary Functionaries" (Ki nongtrei kam kat kum ki dustur): - Ka mut U Lyngdoh lane Pator lane Sangot lane Basan lane uno uno u wei pat uba la thung da u Dolloi bad ka Dorbar kat kum ki riti ki dustur ba la ithuh da ka Executive Committee.

(4) "District": - Ka mut ka Jaintia Hills Autonomous District.

(5) "District Council": - Ka mut ka Jaintia Hills Autonomous District Council.

(6) "Dolloi ne Sirdar": - Ka mut u khlieh nongsynshar Elaka ba kat kum ki dustur ba ioh pateng ia uba la jied kat kum ki jingaibor kane ka Ain.

(7) "Dorbar Elaka": - Ka mut ka Dorbar paitbah katkum ki dustur ka ban kynthup ia baroh ki briew ba la san jong ka Elaka bad ba la ithuh da ka Executive Committee.

(8) "Dorbar Shnong": - Ka mut ka Dorbar pyllun ka Shnong ka ban kynthup ia baroh ki nongshong Shnong ba la san jong ka Shnong ba la thung da u Dolloi/Sirdar ka Elaka bad ithuh da ka Executive Committee.

(9) "Elaka": - Ka mut ka kyntoit hima ba la don pateng la pateng kynthup ia ka jingsynshar Sirdar katkum ba la pyni ha ka Appendix-I lane kano kano ka Elaka kaba lah ban seng ne thung da ka Executive Committee hapoh ki kyndon ba ai bor da kane ka Ain.

(10) "Ilekshon" (Jingjied): - Ka mut ka jingjied sha ka kam Dolloi/Sirdar bad Waheh Shnong.

(11) "Eligible Clan" (Jait kur Dolloi/Sirdar): - Ka mut ka jait ne kur ba la pyni ha ka Appendix-II kiba katkum ki dustur ba dang treikam ha kata ka Elaka kiba lah ban bat ia ka kam Dolloi/Sirdar.

(12) "Executive Committee": - Ka mut ka Executive Committee jong ka Jaintia Hills Autonomous District Council.

- (13) "Executive Dorbar": - Ka mut ka Committee Elaka kaba kynthup ia u Dolloi/Sirdar bad kiwei pat ki dkhot napdeng ki briew ka Elaka ki ban jied da ka Dorbar Elaka bad mynjur da ka Executive Committee.
- (14) "Executive Member": - Ka mut u dkhot ka Executive Committee.
- (15) "Indigenous Tribe" (Riewlum trai ri): - Ka mut ki riewlum nongshong shnong ha Jaintia Hills naduh ki por barim bajah, kata ki Pnar, ki Khasi, ki War, ki Bhoi, ki Biate bad ki Hmar (ba shong ha ki Shnong Khaddum bad Sialkan).
- (16) "Local Authority" (Bor synshar ha ki jaka): - Ka mut ka Municipal Board, Town Committee lane Cantonment Board lane kiwei pat ki bor synshar kiba don ha la ki jaka, lane kiwei pat ia kiba lah ban thaw bad pynkup bor da ka Sorkar kmie, Sorkar Jylla bad Autonomous District Council.
- (17) "Offence" (Kam Beain): - ka mut ka kam beain (jingpynkhein ain) hapoh ka Indian Penal Code ne kano kano ka ain ba dang trei kam ha ri India bad ka kynthup ruh ia ki jingleh ba pynhiar dor ne pyrshah ia ka akor ka burom.
- (18) "Office of profit" (ka kam ba don jingioh myntoi): - Ka mut ka kam ba bat hapoh ka Sorkar jylla ne Sorkar kmie ne Autonomous District Council, ne Municipality ne bor synshar ha la ka jaka ne Seng kamai (Corporate body) kaba don ka jingsiew tulop ne kano kano ka jingsiew.
- (19) "People of the Elaka" (u paid ka Elaka): - Ka mut ia ki trai shnong ba shong ba sah pura hapoh ka Elaka (briew ba long ki nongshong shnong ba shisha ka Elaka).
- (20) "Puja Land" (Khyndew niam): - Ka mut ka khyndew hali ba lait khajna ba la bat bad rep da u Dolloi/Sirdar lane uno uno u nongtrei kam niam bad ia ka jingioh ba mih nangta la pyndon kam ban siew ia ka jingpynlut ha ka leh niam leh rukom katkum ki dustur ka Elaka.
- (21) "Reserved Forest" (Law Adong): - Ka mut ia ka khlaw ba la tyngkai da ka Elaka ne Shnong, kum ki khloo kyntang, khloo Lyngdoh, khloo niam bad khloo shnong khlem da kynthup ia ki khlaw ri-sumar ka District Council bad khlaw reserved ka Sorkar jylla.
- (22) "Returning Officer": - Ka mut ia u Ophisar ba la thung da ka Executive Committee ban trei kam bad pyniaid ia ka jingjied (Ilekshon) Dolloi/Sirdar ha kano kano ka Elaka.
- (23) "Sanad": - Ka mut ka Iktiar ba la ai da ka Executive Committee ryngkat bad ki kyndon ba thikna ha ka jingthung ia ki Dolloi/Sirdar bad Waheh Shnong ha kano kano ka Elaka.

(24) "Service Land" (Khyndew Hali Rek): - Ka mut ia ka khyndew hali Rek balait khajna ba la bat bad rep da u Dolloi/ Sirdar ne uno uno u nongbat/nongtrei kam katkum ki dustur jong ka Elaka kum ka bai nong jong ka jingshakri ba u ai ia ka Elaka.

(25) "Village" (Shnong): - Ka mut ka jaka ba shong bas ah ki briew kynthup ia ki dong ha ki sor bah ne sor rit kaba don la u pud u sam ba thikna ba la pynskhem da u Dolloi/Sirdar bad ithuh da ka Executive Committee.

(26) "Waheh Shnong": - Ka mut ia u briew bala jied da ka Dorbar Shnong ban long u Waheh Shnong bad bala ithuh da ka Executive Committee.

3 (1) Kaba seng Elaka bad u pud u sam: -

(a) Ki Elaka ba don mynta kumba la pyni haka Appendix-I jong kane ka Ain ki long kiba la don bad pynskhem hapoh Jaintia Hills Autonomous District.

(b) Ka Executive Committee naduh ka tarik ba la pyntrei kam ia kane ka Ain kan pynmih ka jingpynbna paitbah ha ka Gazette jong ka Meghalaya ia ki jingtip kiba iadei bad ka jingheh jong ki pud sawdong jong kawei pa kawei ka Elaka ba la pyni ha ka Appendix-I. Ha kata ka jingpynbna yn thoh ruh ia ki kyrteng jong ki Shnong badon hapoh kawei pa kawei ka Elaka.

(c) Ia kano kano ka jingiakhajia pud hapdeng ki Elaka dei ban phah sha ka Executive Committee ban bishar bad ka rai jong ka Executive Committee kan long kaba kut.

(d) Ki Iingbishar Sorkar kin ym lah ban shim bishar ia kano kano ka jingiakhajia kaba iadei bad u pud u sam Elaka.

(2) (a) Ka Executive Committee, da ka jingmynjur ka District Council ha ka jingiashong Dorbar jong ka, ka don ka bor ban thaw Elaka thymmai da kaba pyniasohlang ne pynkhlad ia ka Shnong ne ki Shnong na ki Elaka ba don mynta ia kiba la pyni ha ka Appendix-I.

(b) Ka Executive Committee ha kaba thaw Elaka thymmai, ka dei ban da pynthikna shwa ia ki jingkwah bad jingdonkam jong ki ba bun na ki briew kiba shong ha kita ki Shnong ia ka jingdawa ban thaw Elaka thymmai ha ka ban wanrah ia ka jingsynshar kham jan sha ki briew.

(c) Ka Executive Committee kan pynmih ka jingpynbna paitbah ha ka Gazette ka Sorkar Meghalaya ia kata ka jingthaw Elaka thymmai ryngkat bad ka jingheh ki pud sawdong bad ki kyrteng jong ki Shnong ba kynthup hapoh kata ka Elaka.

Ia ka kyrteng jong kata ka Elaka ba thaw thymmai, dei ban pynrung ha ka list ki Elaka ha ka Appendix-I.

(d) Ka Executive Committee ka don ka bor ban thaw ia ki rul kiba dei ia ki rukom pyniaid Ilekshon, ka jingthep vote, ki nongialeh Ilekshon, ka por trei kam bad kiwei kiwei ha ka jing iadei bad ka Ilekshon ha ka Elaka thymmai.

Kita ki rul ba thaw da ka Executive Committee kim dei ban long pyrshah ne iapher na ki kyndon jong kane ka Ain ha kaba iadei bad ka bor bad jingtrei kam jong u Dolloi/Sirdar.

Nangta shuh shuh kata ka Rul ba la thaw da ka Executive Committee kan trei kam tad ynda la ioh ia ka jingmynjur ka District Council ha ka jingiashong Dorbar (Session).

(e) Ka Executive Committee ka don ka bor ban thung Acting Dolloi/Sirdar ha kata ka Elaka thymmai, hadien kata kan pynlong ia ka jingjied (Ilekshon) Dolloi/Sirdar hapoh hynriew bnai naduh ka tarik ba la pynbna paitbah ba la thaw/seng ia kata ka Elaka thymmai.

4. Ka jingjied (Ilekshon) Dolloi/Sirdar: -

(1) Haba ka ophis u Dolloi/Sirdar jong kano kano ka Elaka bala kdew ha ka Appendix – I ka thylli, ka Executive Committee hapoh ki kyndon kane ka Ain bad ki Rul bala thaw, kan pynlong ia ka jingjied (Ilekshon) Dolloi/Sirdar katkum ki dustur hiar pateng ba dang trei kam ha kata ka Elaka, bad ia kata ka Ilekshon yn pyniaid da u Returning Officer u ban thung bad pynkup bor da ka Executive Committee.

Tangba ia ka jingthep vote ha kata ka Ilekshon ba pyniaid da u Returning Officer hapoh ka sub-rule (1) haneng kan long da ki Secret Ballot.

(2) Tang kiba na ka jait kur Dolloi/Sirdar jong kata ka Elaka katkum ba pyni ha ka Appendix-II ki long kiba lah ban ialeh ia ka Ilekshon hapoh ka sub-section (1) haneng.

(3) U Returning Officer un pynbna ia ka result hapoh shitaiew naduh ka sngi thep vote bad ai ia ka report jong kata ka Ilekshon hapoh ka sub-section (1) haneng sha ka Executive Committee ban ioh tip bad leh ia ki ba donkam.

5. Jingthung Dolloi/Sirdar: -

U nongialeh uba ioh bun tam na ki vote ba larkam ba la thep ha kata ka Ilekshon ba la pyniaid hapoh ka sub-section (1) jong ka Section 4 bad halor ka nongrim jong ka result ba la pynbna jop hapoh ka sub-section (3) jong ka Section 4 jong kane ka Ain, yn thung da ka Executive Committee kum u Dolloi ne Sordar. Ka Executive Committee hapoh laiphew sngi naduh ka tarik ba la pynbna ia ka result jong ka Ilekshon kan ai ia ka Sanad bad ki kyndon treikam kumba la

pyni thikna ha ka Appendix-II ia ka ban soi da u Executive Member ba dei peit ia ka kam synshar Elaka.

6. Jingpynskhem Dolloi Sirdar: -

Ia baroh ki jingthung Dolloi/Sirdar da kaba bud kat kum ka Rul 29 bad 30 jong ka Assam bad Meghalaya Autonomous District (Constitution of District Council) Rules, 1951 katkum ba la pynjari bad pynbit pynbiang da kane ka Council, Ka Executive Committee kadei ban buh ia ka report ha ka jingiashong Dorbar ka District Council kaba lah ban pynskhem ia kane ka jingthung Dolloi/Sirdar hapoh ki kyndon trei kam ba la pyni ha ka Sanad, lane ia kiba lah ban pynbna paitbah na ka por sha ka por. Napdeng kita ki kyndon trei kam ha kata ka Sanad yn kyntup ruh ia kine: -

- (1) Ka bainong.
- (2) Ka jingiadei bad ka District Council lane bad ka Elaka.
- (3) Ki rukom ha kiba ia ka jingsynshar Elaka dei ban bud.
- (4) Ki rukom ban pyniaid ia ka bai seng (fund) jong ka Elaka.
- (5) Ka akor ka burom.

Tangba, katba ym pat lah pynbit pynbiang ia kita ki kyndon ain, ki kyndon ain ba mynta ha kiba la thung ia ki Dolloi/Sirdar kin dang trei kam.

Shuh shuh kita ki kyndon ain kiba yn pynjari da ka District Council katkum kane ka Section kin trei kam mardor na ka bynta baroh ki Dolloi/Sirdar.

7. Ka por bat kam u Dolloi/Sirdar: -

- (1) U Dolloi un neh ha ka kam shi jingim.
- (2) U Sirdar ka Saipung Sirdarship un neh ha ka kam Sirdar 5 snem.
- (3) Ia ki Elaka ban thaw hapoh ka Section 3(2) kin don u Sirdar u ban neh ha ophis kumba san snem bad ym dei ban palat ia ka 10 snem hynrei lah ban jied biang ia u.

8. Ki kyndon ia u nongialeh Ilekshon Dolloi/Sirdar: -

Ia u briew yn ym lah ban jied bad thung ia u sha ka kam Dolloi ne Sirdar, lymda: -

- (1) U dei u nongshong Shnong tynrai ba shong basah ha kata ka Elaka.
- (2) U la dap 25 snem shaneng ka rata.
- (3) U dei uba na ka jaitkur Dolloi ba bit ban bat ia ka kam Dolloi jong kata ka Elaka. La kumta ruh, kane ka sub-section kan ym trei kam ia ka jingjied Dolloi/Sirdar ha ki Elaka ban dang thaw thymmai.
- (4) U briew uba biang ka jingmut jingpyrkhat.
- (5) U dei u bym don ki daw ban khanglad ia u ban ialeh Ilekshon halor ki nongrim ba don ki jingpalat ba u la leh, kiba pynlong ia u u bym bit ban bat

ia ka kam katkum ki dustur ba don pateng kiba dang trei kam ha kata ka Elaka.

9. Ki kyndon Jingbymlah u candidate ban ialeh Ilekshon Dolloi/Sirdar: -

Ia u briew yn ym lah ban jied bad thung kum u Dolloi/Sirdar jong ka Elaka lada: -

- (1) U bat ia kano kano ka kam (ophis) ba don bainong/tulop.
- (2) U long u bym biang ka jingmut jingpyrkhat, uba la pynbna kumta da ka ingbishar ne kano kano ka bor ba shongain bad ba la ithuh da ka District Council.
- (3) U dei u byn pat lait na ka jingdap ram.
- (4) Ha shwa ne hadien ba la don kane ka Ain, la ju don ka jingpalat ba la rai pynrem ia u hapoh ka Ain Indian Penal Code lane Criminal Procedure Code lane hapoh kano kano ka Ain ba pynjari ha Ri India, lane kano kano ka jingpalat ba pynhiar kyrdan ia ka akor long briew man briew.
- (5) U la shah beh kam na ka jingshakri hapoh kano kano ka Sorkar ne District Council ne ki local authority ne corporate body.
- (6) U dei u ba long dkhot sha Parliament ne State Assembly ne District Council ne local authority.

10. Jingiakhajia ha ka Ilekshon Dolloi/Sirdar: -

- (1) Lada jia ba don kano kano ka jingiakhajia halor ki kam ba don jingiadei ne iasnoh bad ka Ilekshon Dolloi/Sirdar ka liang ne ki liang ba pyrshah/bymhun kin thoh sha ka Executive Committee hapoh laiphew sngi naduh ka tarik ba pynbna result da kaba thoh sha U Secretary Executive Committee. Ka Executive Committee kan pyndep ia ka jingbishar hapoh hynriewphew sngi.

Haba leh ia kane ka Executive Committee, ka dei ban ailad ia ki arliang mamla ban said da ia lade.

- (2)(a) Ka apil pyrshah ia ka rai jong ka Executive Committee kan leit sha u Tribunal ban thung da ka Executive Committee na ka bynta kane ka kam bad u Tribunal un pyndep ia ka jingbishar klo katba lah bad kan ym pallat ia ka hynriew bnai naduh ka tarik ba u la ioh pdiang ia ki kot ki sla (Case Record) bad ka rai u Tribunal kan long kaba kut.
- (b) Kano kano ka apil sha u Tribunal dei ban thoh sha u Secretary Executive Committee hapoh laiphew sngi hadien ba ka Executive Committe ka la pynmih ia ka hukum jong ka sha ki liang mamla.

(c) Ka Executive Committee kan thung ia u Tribunal bad phah ia ki kot ki sla (Case Record) sha u hapoh laiphew sngi naduh ka tarik ba la ioh ia ka apil.

11. Weng kam bad sospon ia u Dolloi/Sirdar: -

(1) Ia u Dolloi/Sirdar jong ka Elaka lah ban weng kam ne pynsangeh trei kam shipor (sospon) na ka kam da ka Executive Committee, lada ka shem ba:-

(a) u pynkhein ia ki kyndon ain ka jingthung Dolloi/Sirdar ia u;

Lane

(b) u pynkhein ia ki ain ki rules bad ki hukum jong ka District Council;

Lane

(c) u kyntait ban kohnguh ia ki jingbthah ne hukum ka Executive Committee;

Lane

(d) u pynkhein ia ki riti ki dustur ba ju bud da kata ka Elaka;

Lane

(e) lada shem ia u ba u banbein ia ki briew jong u bad ialam bakla ia ka Elaka;

Lane

(f) lada shem ba um don ka jingmut jingpyrkhat ba biang ban bteng ia ka jingtrei kam;

Lane

(g) lada u la shah rai pynrem na ka bynta kano kano ka jingpalat bad shah rai set patok ym duna ia ka hynriew bnai;

Lane

(h) u ba dap ram dap shah khlem lah siew;

Lane

(i) kiba bun na ki briew ba la san jong ka Elaka jong u kiba don ha ka Dorbar ba la khot khnang ban pynshisha ia ka jingkwah bad ka jingmut jong ki ha kano kano ka rukom ba la pynbeit da ka Executive Committee ki pynpaw ba ki la duh noh ia ka jingshaniah jong ki ia u;

Lane

(j) kiba bun na ki nongthep vote ka Elaka kiba thep ia ki vote(bood) jong ki ha ka ripharendom ba la pynlong khnang ban pynpaw ia ka jingkwah jong ki, ki la thep vote pyrshah ia u;

Lane

(k) lada shem ba um lah ban pyndep ne pyniaid beit ia ka synshar ka khaddar na ka daw ka koit ka khiah, jingshitom ka met, ka jinglong tymmen lane ka jingdih buaid tanglang lane ba um sah hapoh ka Elaka;

Lane

(l) la da shem ba u la pynlong ia lade ne leh ia ki kam ba pynhiar kyrdan ia ka burom ka ophis ne kam jong u kaba ktah ia ka jingsngew jong ki brieve ka Elaka ne ki bynta jong ka.

Lane

(m) la da shem ia u ba u leh ia lade ha ka rukom ba niewpoh ne ibein ia ki bor ka Executive Committee ne ka District Council;

Tangba, ym dei ban beh kam ia u Dolloi/Sirdar khlem da ailad ia u ban said da ia lade.

(2) Nalor kiei kiei ba la thoh haka sub-section (1) haneng, ka Executive Committee ka lah ban pynsangeh trei kam shipor (sospon) ia u Dolloi/Sirdar lada ha ka jing iohi jong ka ka shem ba dei ban leh kam pyrshah ia u hapoh kano kano ka bynta ba la kdew ha ka sub-section (1) haneng, bad ka hukum ba la ai da ka Executive Committee ha kiba kum kita ki kam kan long kaba kut.

(3) Haman ba don ki jingweng kam ne pynsangeh treikam shipor (sospon) ka Executive Committee ka dei ban wanrah ia ka report ha ka Iing Dorbar ka District Council ha ka Session kaba bud.

(4) Ka apil pyrshah ia ka hukum ba la ai hapoh ka sub-section (1) haneng kan leit sha ka Tribunal ka ban thung da ka Executive Committee kat kum ba la kdew ha ka sub-section (2)(c) jong ka Section 10 bad ka rai jong u kan long kaba kut. Ia kiba kum kita ki apil dei ban thoh sha u/ka Secretary Executive Committee hapoh laiphew sngi naduh ka tarik ba la pynmih bad phah ia kata ka hukum lane naduh ba ki mamla ki ioh jingtip.

(5) Nalor kiei kiei ba la thoh hapoh ka sob-sekshon (1) haneng ka Executive Committee ka don ka bor:-

(a) Ban ai hukum beh kam, ne pynshitom ne sospon lada u la shah rai pynrem ha ka ain na kano kano ka jingpalat.

(b) Ban ai hukum sospon katba dang leh ia ka jingtohkit (Enquiry Proceeding).

12. Nalor kiei kiei ba la thoh ha kane ka ain, uno uno u Dolloi/Sirdar ba la shah beh kam hapoh ka sub-section (1) jong ka Section 11, um lah shuh ban ialeh Ilekshon Dolloi/Sirdar.

13. Ka jingshimti ia ka jingsynshar Elaka da ka Exective Committee: - Lada ha kano kano ka por ba ka ophis u Dolloi/Sirdar ka thylli hapoh u ang ne ka bor (provision) kane ka ain, ka Executive Committee ka don ka bor ban shimti mardor ia ka jingsynshar ia ka Elaka bad thung ia uno uno u Ophisar ka District Council ban peit shipor ia ka jingsynshar Elaka tad haduh ban da thung Acting Dolloi/Sirdar bad kata ka por/samoi kam dei ban palat ia ka ar bnai.

14. Jingthung Acting Dolloi/Sirdar: -

(1) Ka Executive Committee kan thung ia uno uno u Rangbah na ka Elaka ban long Acting Dolloi/Sirdar u ban pyndep ia baroh ki kam bad iktiar u Dolloi/Sirdar. U Acting Dolloi/Sirdar un neh ha ka kam ym palat ia ka hynriew bnai ne katba ka Executive Committee ka sngewbit.

(2) Ka Executive Committee kan pynlong ia ka Ilekshon sha ka ophis u Dolloi/Sirdar hapoh khyndai bnai naduh ka tarik ba ka ophis u Dolloi/Sirdar ka thylli.

15. U Dolloi/Sirdar ba la shah sospon ne shah weng kam na ophis u duh noh ka hok ban rep ne pyndonkam ia ki Rek hali ne ki hali niam: -

U Dolloi ne Sirdar ba la shah sospon ne shah weng kam na ka ophis jong u hapoh ka Section 11 un duh noh ka hok ban pyndonkam ne rep ia ki hali Rek ne hali niam, bad ka hok longtraai nalor kita ki khyndew kin long ba la pynphai noh sha ka Executive Committee naduh ka tarik ba beh kam shipor ne weng kam noh na ophis. Ka Executive Committee ka lah ban ai wai ia ki, lane ha kano kano ka rukom ba ibit ibiang lane bat ia ki lyngba u briew jong ka ne Ejen haduh ban da thung kam biang ia u Dolloi/Sirdar ne thung Dolloi/Sirdar thymmai.

Lada jia ba u Dolloi/Sirdar ba la shah weng kam ne sospon u la pynkhreh ia ka khyndew na ka bynta ban thung ne bet lane u la dep pynlut ha kaba pynkhreh ia ka jingrep, lah ban shah ia u ban bteng ia ka jingrep tad haduh ban da dep ot. U Acting Dolloi/Sirdar lane uno uno u briew ba la thung kum u Dolloi/Sirdar un ioh ia ka hok jingmyntoi jong ki hali Rek ne hali niam hadien ba la kut ka aiom ot.

Shuh shuh lada jia ba ka ophis u Dolloi/Sirdar ka iai sah thylli na ki daw bym lah ban kiar bad don jingthoh ha ki dular, ka Executive Committee ka long laitulid ban ai rep wai ia ki khyndew hali sha uno uno u briew ha ka dor bad ka por ban iakut. Ia ka pisa ba ioh nangta yn thep ha ka phon jong ka District Council.

Nangta shuh shuh ba ha kano kano ka por ba u Dolloi/Sirdar um shym pyndep ia ka kam niam um lah ban bat ne rep ia ka hali niam.

16. Ka Dorbar Elaka: -

(1) Ka Elaka ba long khlieh da u Dolloi/Sirdar kan don ka Dorbar Elaka ka ban kynthup ia baroh ki brierw ba la san jong ka Elaka. Ia kata ka Dorbar Elaka yn ithuh da ka Executive Committee.

Ka Dorbar Elaka, ka lah ruh ban thung ne jied kat ban biang ki nong mih khmat na kawei pa kawei ka shnong ki ban mih khmat ia kata ka Shnong sha ka Dorbar Elaka.

(2) Ka Dorbar Elaka ha ka jingialang Dorbar ba la khot khnang, kan jied bad thung ki nongkitkam kumne harum: -

(a) U Chairman ne Shongknor.

(b) U Secretary.

(c) U Assistant Secretary.

(d) Treasurer (Nongbat pisa).

(e) Ki dkhot ym duna ia ka shiphew ngut, bad na kine yn kynthup ia ki kynthei ym duna ia ka lai ngut.

(3) U Dolloi/ Sirdar un long u Chairman/Shongknor ha ka Dorbar Elaka.

(4) U Dolloi/Sirdar un phah ia ka kyrteng, ka kam ba bat bad jaka shong jong baroh ki nongkitkam bad ki dkhot ba la jied man la u snem sha ka Executive Committee ba kan ithuh bad ai jingpynbna.

17. Executive Dorbar: -

(1) Ki nongkitkam kynthup ia ki dkhot ba la thung da ka Dorbar Elaka bad ithuh da ka Executive Committee kin long ka Executive Dorbar ka ban pyntyllun ia ka kam synshar khaddar jong ka Elaka.

(2) Ka Executive Dorbar kan don ka bor ban jied ne thung ia u Vice-Chairman (Symbud Shongknor) napdeng ki dkhot jong ka u ban pyniaid ia ka Dorbar haba u Shongknor um don.

(3) Ka Executive Dorbar kan pyntreikam bad pyndep ia baroh ki rai bad jingiakut jong ka Dorbar Elaka bad ia kano kano ka kam Elaka ba don jingiasnoh.

(4) Ka Executive Dorbar kan kitkhlieh ban pynlong Dorbar Elaka ym duna ia ka shisien shisnem ne man ba ka kam ka dawa.

(5) Ka Executive Dorbar kan hap ai jingkhein sha ka Dorbar Elaka ia baroh ki kam bad jingtrei kam jongka.

18. Ki bor bad pud treikam u Dolloi/Sirdar: -

Da ka ba bud ia ki Rule ki ban thaw da ka Executive Committee halor kane ka Ain, kine harum ki long ki bor bad pud treikam u Dolloi/Sirdar hapoh ka Elaka: -

- (1) Ban peit bad khmih ia ka kam synshar khaddar ka Elaka da ka jingleh minot bad trei smat da kaba bud ryntih ia ka Ain ka Jaintia Hills Autonomous District (Establishment of Elaka and Village and Election, Appointment, Powers, Functions and Jurisdiction of Dolloi/Sirdar and Waheh Shnong) Act, 2015 bad ruh ki Rul ki Ain ka District Council.
- (2) Ban lum/khot ia ka Dorbar Elaka la kumno kumno shisien ha ka shisnem. Ha ki khep ba ka kam ka dawa ne kam kyrkieh lah ban khot bunsien nalor kaba la kdew da kane ka Ain.
- (3) Ban peit bad sumar ia u pud u sam ka Elaka ha ki por baroh bad ai jingpyntip sha ka Executive Committee lada don kano kano ka jingiakhajia pud bad ka Elaka ba mar khap.
- (4) Ban pynneh pynsah bad iada ia ki Law Adong (Reserved Forest) bad ban pynroi pynbun shuh shuh ia ki Law Adong.
- (5) Ban bishar bad rai ia ki Mukotduma paitbah ne kam runar (Civil and Criminal Cases) kat kum ka bor ba la pynkup hapoh ki rules jong ka United Khasi-Jaintia Hills Autonomous District (Administration of Justice) Rules, 1953 katkum ba la pynjari bad pynbit pynbiang da kane ka Council lane kiwei pat ki Rules ba ka District Council ka lah ban pynlong ain na ka por sha ka por.
- (6) Ban iathuh bniah sha ka Executive Committee ia ka jingseng Shnong thymmai, kaba phiah Shnong ne pyniasoh lang kawei ia ki Shnong.
- (7) Ban pyniaid ia ka jingjied Waheh Shnong bad ban pyntip (Report) sha ka Executive Committee.
- (8) Ban thaw Dorbar Shnong ha man la kawei pa kawei ka Shnong.
- (9) Bad peit bad ai jingbthah ia ka kam synshar Shnong.
- (10) Ban pynbeit ia u pud u sam Shnong ba don ki kynrum kynram da ka jingbeit bad jingiasngewthuh jingmut hapdeng ki para nongshong Shnong bad lada ym lah, dei ban pyntip sha ka Executive Committee.
- (11) U Dolloi/Sirdar u don ka bor ban kubur ia ka jingai Land Holding Certificate/Patta bad register khlaw ne pynkylla kyrteng ia kitei ki kot ki sla sha u Revenue Officer/Land Record and Settlement Officer jong ka District Council sha ki trai nongbat khyndew kat kum ki dustur ba ju don ha kita ki Elaka.

Katkum kane ka Ain u Dolloi/Sirdar un phah ia ka jingkubur jong u (recommendation) tang hadien ba u dep kylli tohkit bniah bad pynshisha. Ia kiba kum kita ki kot kubur dei ban suh lang bad ki kot ki sla ba pyni ba u Dolloi/Sirdar u la dep kylli tohkit bniah bad pynshisha.

- (12) Ban buh tyngkai kyrpang ia ki jaka ba kin heh kin san ki dieng na ka bynta ban ai dieng thaw iing ne dieng thang ia ki nongshong Shnong ka Elaka. Bad ruh ban shim ia ki lad ki lynti ba biang ban sumar ia kine ki jaka na ka jingpynjot ka ding ne da kaba rep shyrti.
- (13) U Dolloi/Sirdar u don ka hok bad ka bor ban rep ia ka Hali Rek kum ka bainong ka jingshakri ba u ai ia ka Elaka bad ban rep ia ki Hali Niam ba na ka jingmih un pynlut ha kaba un pyndep ia ki Niam ki Rukom katkum ki Dustur ka Elaka.
- (14) Ban kem ia uno uno u briew ba kem bad pyniap ia ki kynja ba im ha um da kaba ai dawai bih ne pynbthei bom ha ki wah ne ki pung badon hapoh ka Elaka bad ban report mar mar sha ka Executive Committee ne sha kiwei pat ki bor ain ba iadei.
- (15) Ban kem ia uno uno u briew ba pynngat, thoh ne kit ia ki mar khlaw khlem da ioh bor na ka District Council bad ban pyntip mar mar sha ka Executive Committee ne sha ki bor Ain ba iadei.
- (16) Kiwei pat ki bor bad jingtreikam kiba ka District Council ka lah ban ai na ka por sha ka por.

19. Ki Adong: -

U Dolloi/Sirdar Elaka um dei ban leh ha kano kano ka dur ne rukom ban shim rai ne pyntrei kam, ne pynngat, ne map, ne pynshit ha kano kano na kine harum khlem ka jingmynjur ka Dorbar Elaka bad ka Executive Committee: -

- (1) Ban aiwai ne aiduh, dieduh, ne buh bynda lane shah ban aiwai ne aiduh, dieduh, ne buh bynda ia kano kano ka lyngkhot khyndew ne khlaw ha ka Elaka sha ki bym dei riwulum traishnong.
- (2) Ban ai No Objection Certificate ne aibor ban sorjamin ne pyndonkam ia kano kano ka lyngkhot khyndew ne khlaw la ki long ki hok riwshimet ne hok paitbah sha kano kano ka bor ba kynja Seng ne Kompani khlem ka jingmynjur ka Dorbar Elaka bad khlem ka jingtip bad mynjur ka Executive Committee.
- (3) Nalor katei ba la thoh ha ka sub-section (1) bad (2) haneng u Dolloi/Sirdar ka Elaka ha ka liang ki projek Sorkar ba thew na ka bynta ka jingbha bad jingmyntoi u paitbah, u lah ban pynsuk ha kaba aiwai ne aiduh ne buh bynda ia kaba kum kita ki khyndew bad u lah ban ai No Objection Certificate ne aibor ia ki bor Sorkar tang da ka jingmynjur ka Dorbar Elaka bad Ka Executive Committee.
- (4) Um dei ban pynkylla kyrteng ne aiduh ia ki Hali Niam ne Hali Rek sha uno uno u briew ne ki briew.

20. Kaba Seng ne thaw Shnong: -

- (1) Hapoh ki bor jong kane ka Ain, ki Shnong ba don mynta hapoh ki Elaka kin long ki Shnong ba la dep seng ne thaw katkum kane ka Ain.
- (2) (a) Ka Executive Committee ka don ka bor ban seng Shnong thymmai ne phiah ne pyniasoh lang ia ki Shnong lane pynkylla ia u pud Shnong hapdeng ki Shnong hapoh ka Elaka da kaba bud bad pyndep ia kine ki kyndon harum: -
 - (i) Ka jaka kam dei ban duna ia 20 tylli ki iing shong briew bad ruh ym duna ia 50 ngut ki briew ba la san kiba shong Shnong hangta.
 - (ii) Ka jaka kaba kyrpang bad don ka kyteng ba kyrpang.
 - (iii) Ka jingidonlad bad jingkyrmen ba kan nang heh nangroi hadien habud.(b) Ka Executive Committee kam lah ban seng Shnong thymmai khlem da ioh ia ka jingkubur bad jingpynskhem ia ka jingdonkam ban seng Shnong na u Dolloi/Sirdar.
 - (c) Ka Executive Committee kan ai jingpynbna paitbah sha baroh ki bor ba don jing ia dei ia kata ka jingseng ne thaw Shnong thymmai.
- (3) (a) Lada don kano kano ka jingbymhun ne jingkhajia halor ka kam ba don jingiadei bad kaba seng shnong ne phiah shnong ne pyniasoh lang kawei ia ki shnong lane kaba pynbeit ia u pud u sam shnong hapdeng ki shnong hapoh ka Elaka, ka liang ka bymhun, hapoh 30 sngi naduh ka sngi ba pynmih ia ka jingpynbna paitbah ia kata ka jing seng shnong, ne phiah shnong, ne pyniasoh lang kawei ia ki shnong ne pynbeit pud hapdeng ki shnong hapoh Elaka, kin thoh da ka Dorkhas ia kata ka jingbym hun jong ki sha ka Tribunal ka ban thung da ka Executive Committee na ka bynta kata ka kam bad un pyndep ia ka jingbishar hapoh 60 sngi.

Tangba ka Tribunal ka dei ban ailad ia ki liang mamla ban said da lade.

(b) Ka Executive Committee kan thung ia ka Tribunal bad ruh phah ia baroh ki kot ki sla sha ka hapoh 30 sngi naduh ka tarik ba la ioh pdiang ia kata ka Dorkhas.

21. Dorbar Shnong: -

- (1) Kawei pa kawei ka Shnong kan don la ka Dorbar Shnong ka ban kynthup ia baroh ki nongshongshnong ba la san jong ka Shnong. Ia ka Durbar Shnong yn khlieh da u Waheh Shnong ba la jied da u paidbah, thung da u Dolloi/Sirdar ka Elaka bad ithuh da ka Executive Committee.
- (2) Ka Dorbar Shnong kan don ki nongkitkam kumne harum:-

- (a) Waheh Shnong
 - (b) Asst. Waheh Shnong
 - (c) Secretary
 - (d) Assistant Secretary
 - (e) Treasurer
- (3) Ka Dorbar Shnong, lada ka sngewdonkam ka lah ban thung ia u Chairman Shnong uban pyniaid ia ki jingialang Dorbar Shnong.
- (4) Ka Dorbar Shnong kan thung ia ki Auditor ki bym ym dei ban long ki dkhot ka Executive Body.

22. Executive Body ka Dorbar Shnong:-

- (1)Ka Dorbar Shnong kan don ka Executive Body ka ban kynthup ia baroh ki nongkitkam bad ki dkhot ym duna ia ka hynriew ngut ne palat ia ka Khadar ngut ha kaba shibynta na ka lai bynta (1/3) na ki dkhot yn jied napdeng ki kynthei. Kane ka Executive Body kan peit ia ki kam synshar khaddar shnong ba man ka sngi.
- (2)Ka Executive Body kan pyntreikam iabaroh ki rai bad jingiakut ka Dorbar shnong.
- (3)Ka Executive Body kan hap ai jingkhein bad jubab sha ka Dorbar Shnong ia baroh ki kam ba ka trei ne pyndep bad ia kiba khlem trei.

23. Jingjied Waheh Shnong:-

- (1)Hapoh ki bor bala thaw ha kane ka Ain bad ki Rule hapoh jongka, ia u Waheh Shnong dei ban jied da ka Dorbar Shnong.
- (2)Lada ka jingjied Waheh Shnong kam long da kawei ka sur u paidbah, U Dolloi/Sirdar u don ka bor ban pynlong Ilekshon (jingjied) da kaba iathep bood (vote) Secret Ballot ne da kaba iarah kti.

Ia kata ka jingialang na ka bynta ka jingthmu bad jied Waheh Shnong hapoh ka sub-section (2), ka jingdon briew (Quorum) kam dei ban duna ia ka shiteng na ki nongshong shnong ba la san jong ka shnong.

- (3)Ia ka jingjied yn pynlong ha kaba iadon lang u Dolloi/Sirdar ne ki nongmih khmat ba la phah da u Dolloi/Sidar.

24. Ka por bat kam U Waheh Shnong:-

Ia ka por bat kam u Waheh Shnong yn pynbeit da ka Dorbar Shnong hi, tangba kata ka por treikam kam dei ban duna ia ka shi snem ne palat ia ka lai Snem ha kawei ka sien.

25. Ka jingbit ban long nongialeh Ilekshon Waheh Shnong:-

U brierw un long u ba bit bad ba lah ban jied Kum u Waheh Shnong lada:-

- (1)u long u nongshongshnong riwulum trairi jong ka Shnong ym duna ia ka san snem;
- (2)u ba la dap 25 snem shaneng;
- (3)u bym ju shah rai pynrem ha kano kano ka jingpalat bad shah rai set patok ym duna ia ka hynriew bnai;
- (4)um dei u M.D.C.
- (5)um dei u nongtrei ka District Council.

26. Ka jingpynskhem bad thung Waheh Shnong:-

U Dolloi/Sirdar un pynskhem ia ka jingjied Waheh Shnong bad un pyntip mar mar sha ka Executive Committee ban ithuh bad ai sanad kum ba la pyni ha ka Appendix – IV bad pynmih jingpynbna paitbah ia kata ka jingthung Waheh Shnong da kaba phah kopi sha baroh ki bor ba don jing ia dei.

27. Ka jingbym iahun iabeit ha jingjied Waheh Shnong:-

- (1) Lada don kano kano ka jingbymiahun ne iabeit halor ka kam ba iadei ne don jingiasnoh bad ka kam jied Waheh Shnong, ka liang ne ki liang bym hun kin thoh Apil sha ka Executive Committee hapoh laiphew sngi naduh ka tarik ba pynmih result Ilekshon bad ka rai ka Executive Committee kan long ka bakut.
- (2) Ka Executive Committee kan pyndep ia ka jingbishar kloï katba lah bad ym dei ban palat ia ka 90 sngi naduh ka tarik ba ioh pdiang ia ka Apil.

28. Jingweng Kam Waheh Shnong:-

- (1) U Waheh Shnong un kut noh ka jinglong Waheh Shnong hadien ba la kut ka por trei kam ba la buh.
- (2) Lada ha kano kano ka por ba ka Dorbar Shnong ne u Dolloi/Sirdar ki shem ba u Waheh Shnong u treikam ha kata ka rukom ba long pyrshah ne ktah ia ka jingsngew jong ka shnong ne jong ka Elaka ne jong ka District Council lane ba um shym lah ban trei kam ne trei hok ia ka kam, u Dolloi/Sirdar hadien ba la pyntikna ia ka jing uxor ne rai jong ka Dorbarshnong, un report ia kata ka kam sha ka Executive Committee ka ban shim rai halor ka jingweng kam Waheh Shnong.

Tangba ymdei ban pynduh Waheh Shnong iano iano khlem da ai lad ia u ban saidda ia lade.

- (3) Ha ki khep ba u Dolloi/Sirdar um shym trei kam ne leh ei ei halor ka jingujor ne rai ka Dorbar Shnong hapoh laiphew sngi, ka Dorbar Shnong ka lah ban thoh beit sha ka Executive Committee ban ai ka rai.

29. (1) Ka Apil pyrshah ia ka rai ka Executive Committee kan leit sha ka Tribunal kaba yn thung da ka Executive Committee na ka bynta kata ka kam bad ka Tribunal kan pyndep kloi katba lah ha kaba bishar ia ka kam bad kan yn palat ia ka 90 sngi naduh ka tarik ba la iohpdiang ia ki kot ki sla bad ka rai ka Tribunal kan long kaba kut.

(2) Ia ka Apil sha ka Tribunal dei ban thoh sha u/ka Secretary Executive Committee hapoh 30 sngi naduh ba la phah ia ka hukum sha ki liang mamla.

(3) Ka Executive Committee kan thung ia ka Tribunal bad phah ruh ia ki kot ki sla hapoh 30 sngi naduh ka tarik ba iohpdiang ia ka Apil.

30. Jingthung Acting Waheh Shnong:-

Lada ha kano kano ka por ba ka kam Waheh Shnong ka thylli lah ban long na ka jingiap, ne iehnoh kam, ne shah pynduh kam, ne ka jingbishar ia ka Apil pynkhein Waheh Shnong ka dang sah teng ha kaba ym pat lah ban pynlong ilekshon jied Waheh Shnong, hynrei ka kam ka dawa ban thung Waheh Shnong, kyrkieh, u Dolloi/ Sirdar u lah ban thoh kubur sha ka Executive Committee ia ka kyrteng u briew ban thung kum u Acting Waheh Shnong u ban pyntreikam bad pyndep ia baroh ki kamram bad ki bor jong u Waheh Shnong. U Acting Waheh Shnong un neh ha ophis ym palat ia ka hynriew bnai naduh ka tarik ba thung ia u.

31. Ki bor bad jingtrei Kam U Waheh Shnong:-

Hapoh ki jingdawa jong ki rule ba lah ban thaw da ka Executive Committee halor kane, U Waheh Shnong ryngkat bad ka Dorbar Shnong un don kine ki bor bad jingtrei kam hapoh la u pud u sam kumne harum:-

- (1) Ka Synshar khaddar ia ki kam Shnong kam thaw ki ban wan rah ia ka roi ka par jong ka Shnong.
- (2) Ban khot Dorbar Shnong ym duna ia ka lai sien shisnem lane kham bunsien katba ka kam ka dawa lane haba la kwah ne dawa pynlong Dorbar da ki pait nongshongshnong ba la san ym duna ia ka mar shiteng.
- (3) Ban ri bad pynneh ia ka shongsuk shongsain, ka bha ka miat ha shnong ha thaw.
- (4) Ban ai jingiarap ia u Dolloi/Sirdar ne ki briew jong u haba ki shim jingkylli tohkit (enquiry) ia ka jaka puta, ka khyndew ka shyiap ki khlaw ki btap jong ki riew shimet ne jaka paitbah ne ia kano kano ka kam.

- (5) Ban ai jingiarap ia ki briew ka District Council, ka Sorkar jylla ne nongtrei jong kano kano ka sorkar ne seng ha baroh ki prokram ba don jingiadei bad ka roi ka par, ka bha ka miat ka imlang sahleng ne kyntiew ia ka shnong bad ka jaitbynriew.
- (6) Ban buh jingthoh (record) ha ki Register ia ki longing longsem bad ki kyrteng ki nongshong shnong baroh hapoh shnong bad ruh ia kino kino kiba nabar shnong ne bar jylla ba wan trei wan sah hapoh ka shnong jong phi.
- (7) Ban peit bad sumar ia u pud u sam ka shnong bad lada don kano kano ka jingbym ia beit bad ki marjan shnong dei ban pyntip sha u Dolloi/Sirdar.
- (8) Ban pynbeit da ka lynti basuk bad jing ia sngewthuh jingmut ia kano kano ka khajia majia hapoh shnong poh thaw.
- (9) Ban pynneh pynsah ia ka jingitynnad ka mariang (ecological balance) ia ka khuid ka suba ki lynti ki syngkein, ki umbam um dih, ki mar mi matta bad kiwei kiwei hapoh shnong poh thaw.
- (10) Ban wad ia ki lad jingiarap pisa (grant) bad pdiang ia ki jingiarap pisa ne jingaisngewbha na ki bor Sorkar ne na kiwei pat na ka bynta ban pyntreikam, pynbit pynbiang ia ka roi ka par jong ka shnong.
- (11) Ban ai jingpynshisha (Certificate) ia ki nongshongshnong kum ki jingpynshisha ia ka jinglong jingim (Character Certificate), Certificate Nong shong shnong (Residential Certificate), N.O.C, Certificate pynshisha ia ka jingkha, jingiap bad kiwei ha ba donkam da ka Sorkar ne ka District Council ne kiwei kiwei pat ki bor na ka bynta ka jingbit jingbiang bad jingbha ki nongshong shnong.
- (12) Ban buh jingthoh (record) ha ki Register ia baroh ki Certificate ba la ai (issue) ha la ki jait Certificate.
- (13) Ban maham ba uno uno u nongshong shnong um dei ban thaw jingkulmar jingkhajia ne jingpynwit ia kiwei ha shnong ha thaw ne buaid tanglang ne leh ia ki kam runar.
- (14) Ban pyntip mar mar sha Police Station ia kano kano ka jinglehkam runar ne jingmlien ban leh runar ba jia hapoh shnong poh thaw lane ia ka jingdon ki bar ri hapoh shnong.
- (15) Ban ai jingtip sha u Dolloi/Sirdar ne Police ne sha ka Executive Committee ia ka jingdon jong ki nongkharii kiba khlem da bud ia ki ain ki kanun ba la pynjari da ka District Council ne ka Sorkar Jylla ne Sorkar Kmie.
- (16) Ban pyntip paidbah ha shnong shaphang ki Skhim (Scheme) ba wan na kano kano ka bor lane na ka District Council lane na ka Sorkar Jylla ne na ka Sorkar Kmie kiba iadei bad ka roi ka par ne jingmyntoi u Paidbah.

- (17) Ban pyntreikam ha kano kano ka por ia kano kano ka hukum ne jingbthah ba la ioh pdiang na u Dolloi/Sirdar ne ka Executive Committee ne na ka Sorkar halor kano kano ka kam.
- (18) Ban plie bad buh jingkhein (Account) ia ki pisa tyngka ka Dorbar Shnong ha ki Bank ba la ithuh da ka Sorkar.
- (19) Ban sumar bad buh jingthoh ia ka bai seng (fund) ka Dorbar Shnong naduh ki Cash Book (Receipt) Risit Book, ka Bui jingioh bad jingpynlut bad kiwei kiwei.
- (20) Ban ai resit (receipt) ia kano kano ka jinglum pisa. Ia ka dor dei ban buh pynthikna bad pynbna paidbah da ka Dorbar Shnong.
- (21) Ban khmih bniah (audit) ia ka Pisa tyngka ka Dorbar Shnong.
- (22) Kano kano ka kam ne ka bor ba lah ban ai da ka Executive Committee na ka por sha ka por.

32. Ki Adong:-

U Waheh Shnong bad ka Dorbar Shnong haba ki trei bad pyndep ia ki kam shnong kam thaw kim dei ban :-

- (1) Beh Shnong ne tait shnong ia kano kano ka longing ne ia uno uno u dkhot ka Ing kiba long ki nongshongshnong jong ka shnong.
- (2) Ban don ka jingpyniapher ne leh shilliang hapdeng ki nongshnong shnong tang na ka daw ka niam, ne kynhun, ne jait bynriew, ne jinglong kynthei ne shnynrang ne jaka ba kha lane ia uno uno na ka ba iashim bynta ha ki kam bhalang, kam pynroi ne kino kino ki kam shnong kam thaw.
- (3) Ban ai N.O.C ne certificate ia kiba la kdew ha ka Section 31(11) ha ka rukom ba long khongpong (Arbitrary).
- (4) Ban im ka jingim ne leh ki jingleh ba pynhiar kyrdan ia ka longbriew man briew jong u, ne ia ka kam (ophis) jong u ne ban pynhiar dor ia ka burom ka Dorbar Shnong ne ia ka bor synshar ka District Council.

33. Ka jingjied, jingthung bad jingbeh kam ia ki nongtrei kam ba la thung kat kum ki Dustur:-

- (1) U Dolloi/Sirdar u don ka bor ban pyniaid ia ka jingjied (Election), jingthungkam bad beh kam ia ki nongtrei kam ba la thung kat kum ki riti Dustur ki ba dang trei kam hapoh ka Elaka.
- (2) U Dolloi/Sirdar un phah jingtip sha ka Executive Committee, ia ka kyrteng, ka kam ba bat bad ka kamram jong u Lyngdoh, U Pator, ne Basan ne kino kino ki nongtreikam ba kat kum ki dustur ban tip bad ai jingpynbna.

(3) U Dolloi/Sirdar un pyntip sha ka Executive Committee ia ka jaka bad jinglong ki khyndew niam (puja land) bad ki Rek (Service land) kiba don ha kata ka Elaka ia kiba la bat bad rep da ki nongtrei ba la thung katkum ki dustur ka Elaka na ka por sha ka por.

34. Appeal:-

Baroh ki dorkhas (appeal) sha ka Executive Committee/Tribunal hapoh kane ka Ain, dei ban thoh ne uxor ha ki ar kopi sha u/ka Secretary Executive Committee ryngkat bad ka bai dorkhas katkum ka dor ba la pynbeit da ka Executive Committee na ka por sha ka por.

35. Ka bor ban thaw Rule:-

Ka Executive Committee ka don ka bor ban thaw ia ki Rule bad dei ban ioh ia ka jingmynjur na ka District Council ha kaba pyntreikam ia ki jngthmu kane ka Ain.

36. Kaba pynduh bad pynneh pynsah:-

Naduh ka tarik ba kane ka Ain ka la treikam ia kine ki ain harum la pynkut noh:-

- (1) Ka United Khasi- Jiantia Hills Autonomous District (Appointment and Succession of Chiefs and Headmen) Act., 1959.
- (2) Ka Jaintia Hills Autonomous District (Appointment and Succession of Chiefs and Headmen) Amendment Act., 1973.
- (3) Ka Jaintia Hills Autonomous District (Appointment and Succession of Chiefs and Headmen) (Second Amendment) Act., 1975.

La Shah hapoh ka Ain ba:-

- (1) Kane ka jingpynkut noh/Jingpynduh noh kan ym don jingktah ia kano kano ka kam ba la dep leh ne ka jingleh ba la sdang ha shwa ba kane ka Ain kan trei kam.
- (2) Baroh ka jingthungkam, ki hukum ne jingpynbna ba la pynmih, ki bor ba la pynkup, lane ki jingtreikam ba la sdang hapoh kine ki Ain ba la pynduh noh, hangno hangno haba don jingiadei bad kane ka Ain, yn shim ia ki kum kiba la pynlong, la leh, la shim bad la sdang hapoh ki kyndon ain ba iahap jong kane ka Ain.

Ka jingiathuh ia ki daw bad ki jingthmu.

Kumba ia ka Jaintia Hills Autonomous District (Appointment and Succession of Chiefs and Headmen) Bill, 2003 ba la passed da ka Council kam shym la ioh ia ka jingmynjur u Governor haduh mynta bad na ka daw ka jingkylla jong ka por bad ki jingjia ia katei ka Bill la pan pynphai noh bad la iohpdang biang ia ka da kane ka District Council na ka Ophis jong ka District Council Affairs Department ka Sorkar Meghalaya, ka la idonkam eh ia ka Council ban thaw ia kane ka Ain ba thymmai.

Da kumta la mih kane ka Ain

**Thombor Shiwat
Chief Executive Member
JHADC., Jowai.**

Ia kane ka Ain la pass da ka Ing Dorbar ka District Council ha ki jingshong Dorbar Budget Session ba la long ha u bnai Lber, 2015 bad la pynbit pynbiang bad mynjur pat ha ka Dorbar kyrpang ka Council ba la long ha ka 3 tarik u Naitung, 2015 bad la pynbit pynbiang shuh shuh bad mynjur ha ka Dorbar kyrkieh ba kyrpang ka Council kaba la long ha ka 21st tarik u Nohprah, 2015. Ban pynskhem ia kane nga buh ka jingsoi kyrteng harum.

**L.S. Shylla
Chairmain District Council
JHADC., Jowai.**

Nga la mynjur ia kane ka Ain

Dated Shillong
The 23rd Lber, 2015.

**V. SHANMUGANATHAN
GOVERNOR KA MEGHALAYA**

FINANCIAL MEMORANDUM

Kane ka Ain ynda haba la pynlong Ain ia ka, kan ym ktah ia ka jinglut jingsep jong ka Council.

APPENDIX – I

{Under Section 3(1)(a)}

Schedule of existing Elakas.

1. Elaka Amwi.
2. Elaka Darrang.
3. Elaka Jowai.
4. Elaka Lakadong.
5. Elaka Maskut.
6. Elaka Mynso.
7. Elaka Narpuh.
8. Elaka Nartiang.
9. Elaka Nongjingi.
10. Elaka Nongbah.
11. Elaka Nongkhlieh
12. Elaka Nongtalang.
13. Elaka Raliang.
14. Elaka Rymbai.
15. Elaka Satpator.
16. Elaka Shangpung.
17. Elaka Sutnga.
18. Elaka Shilliang Myntang.
19. Sirdarship Saipung.

APPENDIX – II
{Under Section 4(2)}
Schedule of Eligible clans.

<i>Sl no.</i>	<i>Name of Elaka</i>	<i>Eligible clans</i>
1.	Amwi	1. Jaid kur Tariang 2. Jaid kur Massar 3. Jaid kur Pyrtuh
2.	Darrang	1. Jaid kur Rynngksai 2. Jaid kur Lymba 3. Jaid kur Kongwang 4. Jaid Kur Syngkrem
3.	Jowai	1. Jaid kur Sookpoh-Khadarwyrnai 2. Jaid kur Le Kyllung – (Rymbai, Najjar & Toi). 3. Jaid kur Talang-Lato (Lato & Thma Shynret).
4.	Lakadong	1 Jaid kur Shadong 2. Jaid kur Rymbai 3. Jaid kur Suchen
5.	Maskut	1. Jaid kur Rynjah 2. Jaid kur Tyngkra 3. Jaid kur Mukhim
6.	Mynso	1. Jaid kur Myrchiang 2. Jaid kur Situng 3. Jaid kur Pakma which comprise of Jaid kur Pastieh/Pan/Kya 4. Jaid Kur Syntem(which also comprise of Jaid kur Lyngdoh
7.	Narpuh	1. Jaid kur Patwad 2. Jaid kur War 3. Jaid kur Kyndoh 4. Jaid Kur Pyrngai
8.	Nartiang	1. Jaid kur Dhar 2. Jaid kur Dkhar 3. Jaid kur Lamare

<i>Sl no.</i>	<i>Name of Elaka</i>	<i>Eligible clans</i>
9.	Nongbah	1. Jaid kur Pasi 2. Jaid kur Biam 3. Jaid kur Thubru 4. Jaid Kur Hinge
10.	Nongjngi	Jaid kur Sariang:- Kyndong, Samati, Ramut, Snieh, Daw, Shalani, Tahiah, Khariah, Laskor.
11.	Nongkhlieh	1. Jaid kur Sukhlain 2. Jaid kur Pyrngap 3. Jaid kur Dkhar 4. Jaid kur Pajuh
12.	Nongtalang	1. Jaid kur Lyngdoh 2. Jaid kur Lamin 3. Jaid kur Myrchiang
13.	Raliang	1. Jaid kur Lyngdoh 2. Jaid kur Biam 3. Jaid kur Dkhar 4. Jaid kur Suchiang 5. Jaid kur Lamare 6. Jaid kur Synnah
14.	Rymbai	1. Jaid kur Lyngdoh 2. Jaid kur Nongtdu 3. Jaid kur Swer
15.	Satpator	1. Jaid kur Myrlia 2. Jaid kur Pamblang 3. Jaid kur Pohkyrnu 4. Jaid kur Lyngdoh Susa 5. Jaid kur Laka-shiang
16.	Shangpung	1. Jaid kur Sungoh 2. Jaid kur Dhar Suchiang 3. Jaid kur Phyllei-Langbang 4. Jaid kur Suiam-Langstang 5. Jaid kur Shylla-Rabon

<i>Sl no.</i>	<i>Name of Elaka</i>	<i>Eligible clans</i>
17.	Shilliang Myntang	1. Jaid kur Bareh 2. Jaid kur Sariang 3. Jaid kur Liam 4. Jaid kur Talang
18.	Sutnga	1. Jaid kur Pala 2. Jaid kur Sutong 3. Jaid kur Sutnga 4. Jaid kur Muliar
19.	Sirdarship Saipung	1. Jaid kur Nampui 2. Jaid kur Darnei 3. Jaid kur Ngamlai 4. Jaid kur Ngirsim 5. Jaid kur Thiate

(Translated copy)

APPENDIX –III
(Under Section 5)

JAINTIA HILLS AUTONOMOUS DISTRICT::JOWAI.

SANAD

(Doloi/Sirdar)

Ka Dur u
Doloi/
Sirdar



JHADC/POL/ _____

of Jowai, The _____ 201__

Ia kane ka SANAD ban long u Doloi/Sirdar jong ka Elaka _____ la ai ha phi u _____ shnong _____ East/West Jaintia Hills District.

Kane ka SANAD ba la ai haphi ka long ba ia ka jingthung Doloi/Sirdar ia phi kat kum ka jing pynbna kaba No _____ dated _____ la pynskhem ha ka _____ da ka Ing Dorbar jong ka Jaintia Hills Autonomous District Council katkum ka Section 5 jong ka JHAD (Establishment of Elaka and Village and Election, Appointment, Powers and Functions of the Doloi/Sirdar and Waheh Shnong) Act, 2015, ba la pynjari da kane ka District Council.

Kane ka SANAD ka pynkup haphi ia ka bor ban synshar-khaddar bad sumar sukher, ia ki riti ki dustur, ia ka shong suk shong sain bad ka roi ka par ka Elaka _____

Ki kyndon kane ka Sanad ki long:-

1. Ba phin long u Doloi/Sirdar jong ka Elaka _____ katkum ki riti bad dustur.
2. Ba ha ka jingtreikam jong phi U Doloi/Sirdar kan long kat kum ka aiñ ba la buh ha ka JHAD (Establishment of Elaka and Village and Election, Appointment, Powers and Functions of Doloi/Sirdar and Waheh Shnong) Act, 2015, ba la pynjari da kane ka District Council bad ba phin kohnguh de ia ki hukum bad jingpyniaid kam ka District Council.
3. Ba phin bishar ia ki Mukotduma Dewani bad Phoidari kum u Chairman ka Village Court kat kum ki bor ba la pynkup ia phi da ka United Khasi-Jaintia Hills Autonomous District (Administration of Justice) Rules 1953 ba la pynjari da kane ka District Council.
4. Ba phin synshar ruh ia ka Elaka kat kum ki ain ki kanun ba la pynjari da ka District Council bad kat kum ki riti ki dustur kiba don hapoh ka Elaka.
5. Ba phi dei ban lum ia ka khrong ka Dan, u synniang u bynhei ka Elaka kat kum ka niam ka rukom bad ka dustur ka riti, kiba la mynjur bad ai bor daka District Council.

6. Ba phim donhok ban die ne ai wai ne bynda ne shah iano iano ban die ne aiwai ne bynda ia ki khyndew ne shyiap ki khlaw ki btap sha uno uno ne kano kano kiba dei ki mynder ne sha kino kino kiwei pat ki bor Sorkar. Phi dei ban ai jingtip sha ka District Council lada don kum kine ki jingiadie iathied ne aiwai khyndew.
7. Ba phim dei ban ai No-Objection Certificate ne permission ban survey ne pyndonkam ia kano kano ka jaka khyndew ne khlaw la ka dei ka jong ki riewshimet ne jaka paitbah sha kano kano ka bor Sorkar ne Company khlem ka jingmynjur ka dorbar Elaka bad khlem ka jingtip bad jingmynjur ka District Council.
8. Ba haba phi phah ia kino kino ki application jong ki briew sha ki ophis ka District Council, la ki dei kaba Pan Patta hali thymmai, ne pan Land Holding Certificate, ne pan register khlaw, pan pynkylla kyrteng Patta/L.H.C, phi dei ban da kylli tohkit bniah shwa ban ai ia ka report jongphi sha ka ophis.
9. Ba phi dei ban peit bad sumar ia ki wah ki um badon hapoh ka Elaka jongphi ban ymdon kano kano ka jingpynsnewdur ne jingpynjot kaba khanglad ia u paidbah ban pyndonkam ia ki.
10. Ba phi dei ban kem bad pyntip sha ka Executive Committee lada phi lap iano iano ba shoh ne pyniap dohkha da ki dawai bih ne jait bom ha ki wah hapoh ka Elaka jongphi.
11. Ba ka Ophis jong phi kum u Dolloi/Sirdar ka dei ban long ha _____ kaba long ka Headquarter jong ka Elaka _____.
12. Ba ka Bam Dolloi jong phi ka long ki Rek Dolloi kat kum ki riti ki dustur lem bad kiwei pat ki jingioh kat kum ki dustur ki riti bad ki hukum ba la pynjari da ka District Council.
13. Ba phi dei ban wad jingiarap ne jingpynshai na kane ka District Council ia kino kino ki kam ba phi shem jingeh.
14. Ba phi dei ban kohnguh ia kano kano ka hukum ba la pynmih da ka District Council

**Executive Member,
In-charge Elaka Administration
Jaintia Hills Autonomous District Council
Jowai.**

(Translated copy)
APPENDIX –IV
(Under Section - 26)

JAIINTIA HILLS AUTONOMOUS DISTRICT COUNCIL::JOWAI.

**SANAD
WAHEH SHNONG**

Ka Dur u
Waheh
Shnong



No. JHADC/POL/ _____
Jowai, The _____ 201__

Ia kane ka SANAD la ai ha phi u
Shnong _____

Khun U _____ ban long u Waheh Shnong jong ka
Shnong _____ Elaka _____ East/
West Jaintia Hills District na ka bynta _____ Snem, naduh _____ 20____
haduh _____ 20____. Kumba la thung ia phi daka jingpynbna
No. JHADC/POL/ _____ Dt- _____ katkum ka Section ba 26 jong
ka JHADC (Establishment of Elaka and Village and Election, Appointment, Powers, Functions
and Jurisdiction of the Dolloi/Sirdar and Waheh Shnong) Act, 2015 ba la pynjari da kane ka
District Council.

Da kane ka SANAD la pynkup haphi bad ka Dorbar Shnong ia ka bor ban peit ia ka
synshar-khaddar, ka shong suk shong sain, ka bha ka miat bad ka roi ka par jong ka Shnong jong
phi.

Ki kyndon kane ka Sanad ki long:-

1. Ba phin long u Waheh Shnong jong ka Shnong _____
Elaka _____ East/West Jaintia Hills District naduh _____ 20____
haduh _____ 20____.
2. Ba maphi bad ka Dorbar Shnong phin pyniaid ia ka jingtreikam ka jong phi katkum ki ain
ka JHADC (Establishment of Elaka and Village and Election, Appointment, Powers,
Functions and Jurisdiction of the Dolloi/Sirdar and Waheh Shnong) Act, 2015 bad ki
Rules ba la thaw na kane ka Act ba la pynjari da kane ka District Council.
3. Ba ka Dorbar Shnong kan long man ka por ba donkam bad ym dei ban duna ia ka lai sein
shi snem.
4. Ban peit bad ri ia ka shongsuk shongsain hapoh Shnong hapoh thaw.

5. Ban ai ka jingiarap ia u Dolloi/Sirdar ne ki briew jong u haba ki shim jingkylli-tohkit (enquiry) ia ka jaka puta, ka khyndew ka shyiap, ki khlaw ki btap jong ki riew shimet ne jaka paitbah, ne ia kano kano ka kam.
6. Ban ai ka jingiarap ia ki briew ka District Council, ka Sorkar jylla ne nongtrei jong kano kano ka Sorkar ne Seng ha baroh ki programme ba don jingiadei bad ka roi ka par, ka bha ka miat ka imlang-sahlang ne ban kyntiew ia ka Shnong bad ka jaitbynriew.
7. Ban buh jingthoh (record) ha ki Register ia ki Iing ki Sem bad kyrteng ki Nongshong Shnong baroh hapoh ka Shnong bad ruh ia kino kono kiba nabar shnong ne bar jylla ba wansah wan trei hapoh ka shnong jong phi.
8. Ban peit bad sumar ia u pud u sam ka Shnong, bad lada don kano kano ka jingbymiabeit bad ki marjan shnong dei ban pyntip sha u Dolloi.
9. Ban pynbeit da ka lynti ba suk bad sngewthuh jingmut ia kano kano ka khajia majia hapoh shnong pohthaw.
10. Ban pynneh pynsah ia ka jingitynnad ka mariang (ecological balance) ia ka jingkhuid jingsuba ki lynti ki syngkien ki umbam umdih ki nur um ki nalla bad kiwei kiwei hapoh shnong poh thaw.
11. Ban wad ia ki lad jingiarap pisa (grant) na ka bynta ban pyntreikam pynbit pynbiang ia ka roi ka par jong ka shnong.
12. Ban ai jingpynshisha (certificate) ia ki nongshong shnong kum ki Certificate nongshong shnong (residential) N.O.C ban khaii pateng hapoh u pud ka shnong, jingpynshisha jinglong (character), jingkha, jingiap bad kiwei haba donkam da ka Sorkar ne kiwei kiwei pat ki bor na ka bynta ka jingbit jingbiang bad jingbha ki nongshong shnong. Hynrei phim dei ban ai certificate kulmar.
13. Ban buh jingthoh (records) ha ka Register ia baroh ki Certificate ba la ai (issue) ha la ki jait certificate.
14. Ban maham ba uno uno u nongshong shnong um dei ban thaw jingkulmar, jingkhajia ne jingpynwit ia kiwei ha shnong ha thaw bad bymbit ban leh ia ki kam runar.
15. Ban report sha ki Police ia kano kano ka kam runar, kam kulmar ne jingpynkulmar ba jia hapoh shnong pohthaw.
16. Ban ai jingtip sha u Dolloi/Sirdar ne Police ne sha ka Executive Committee ia ka jingdon jong ki nongtrei bar jylla ne bar ri ba wan trei ne wan shong wan sah ne khaii hapoh u pud ka shnong ka thaw.

17. Ban pyntip paitbah hapoh shnong pohthaw ia ki scheme ba wan na ka sorkar ne nawei kiba iadei bad ka roi ka par ne jingmyntoi u paitbah.
18. Ban kohnguh ban pyntreikam ia kino kino ki hukum ba wan na u Dolloi/Sirdar ne na ka District Council ne ka Sorkar Jylla.
19. Ban plie Account tang ha ki Bank ba la ithuh da ka Sorkar ban buh ia ki pisa tyngka ka shnong.
20. Ban buh jingthoh ia ki jingkhein jingdiah ka pisa tyngka jong ka shnong.
21. Ban ai official receipt ia kano kano ka jinglum pisa kat kum ka dor ba la buh da ka Dorbar Shnong.
22. Ban phah audit (bishar) ia ki jingkhein jingdiah ki pisa tyngka jong ka shnong.
23. Ban kohnguh bad pyntreikam ia kano kano ka hukum ne jingbthah ne ia kano kano ka kam ne jingaibor ban dang pynmih da ka District Council na ka por sha ka por.

Jingmana katkum ka Section 32 jong ka Act: -

U Waheh Shnong bad ka dorbar ha ka jingtrei bad pyniaid kam jong ki kim dei ne bit: -

1. ban beh ne tait Shnong ia kano kano ka long iing lane ki dkhot ka long iing jong ka Shnong ka thaw.
2. ban pyniapher ne niew ne leh shilliang ia ki nongshong shnong tang namar ka jingpher ka jait ka kynja ne ka niam ka rukom ne na kiba kum kita ki daw ban pynduh bynta ia ki ban iashim bynta ha ka roi ka par bad kiwei kiwei ki kam Shnong.
3. ban ai pathar ia ki No Objection Certificate lane kino kino ki Certificate kiba la batai ha ka sub-section (11) jong ka Section 31.
4. ban leh ia ki kam kiba pynjah burom ia ka kam Waheh Shnong ne pynhiar dor ia ka burom jong ka Dorbar Shnong ne ka iktiar jong ka District Council.

**Executive Member,
Incharge Elaka & Village Administration
Jaintia Hills Autonomous District Council
Jowai.**